

DUŠEVNI MIR

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji svojoj duši traže mir.

Braćo moja u Dini Islamu! Jedna od najvećih blagodati jeste duševni mir. Ko ga pronade, pronašao je bogatstvo veliko. A on se krije u tri osobine: toleranciji, optimizmu i ignorisanju.

Tolerancija ili opraštanje je vrlina i, ujedno, moralni princip koji se ogleda u zaboravljanju prošlosti i odricanju od prava na osvetu zbog uvreda i štete koje su čovjeku nanesene. Kao takva, tolerancija ne predstavlja čin samoponiženja ili kukavičluka, već je znak čistoće srca, ljubavi, dobrote, samilosti i empatije.

Jednom prilikom su ashabi upitali Poslanika, s.a.v.s.: "Koji čovjek je najbolji?", pa je on rekao: ***"Onaj koji govori istinu, koji se Allaha boji i u tajnosti i u javnosti, i koji posjeduje čisto srce u kojem nema zlobe, mržnje i zavidnosti."*** (Ibn Madže, hadis sahih)

Tolerancija je traženje izgovora za one koji su pogriješili prema nama, kao i traženje uzroka njihove pogreške, kako bi im se mogla pružiti pomoć ako im je potrebna. To je znak želje za ljepšim životom i suživotom, i ujedno je ibadet kojim se vjernik približava svome Gospodaru i Džennetu.

Gospodar svjetova poručuje: **"I nastojte zaslužiti oprost Gospodara svoga i Džennet prostran kao nebesa i Zemlja, pripremljen za one koji se Allaha boje, koji udjeljuju i kad su u obilju i kad su u oskudici, koji srdžbu savladavaju i ljudima praštaju – a Allah voli one koji dobra djela čine."** (Ali Imran, 133-134.)

S tim u vezi hazreti Alija, r.a., kaže: "Ako si u mogućnosti da se osvetiš svom neprijatelju, neka tvoje opraštanje njegove pogreške bude izraz zahvalnosti Allahu što ti je dao moć nad njim."

Što se tiče optimizma, on se bazira na građenju lijepog mišljenja o Uzvišenom Allahu i potpunom oslanjanju na Njega. Islam ga široko afirmira, jer optimizam donosi rahatluk, otvara vrata nade, otklanja tjeskobu iz grudi, umiruje savjest i jača srce.

Čitajući životopis Poslanika, s.a.v.s., primjećujemo njegov optimizam u svim poslovima i životnim situacijama. On je volio optimizam i volio je da donosi radosne vijesti i da obrađuje ljude. Govorio je da voli lijepe i dobre predznake i mnogo puta je koristio izraz: ***"Raduj(te) se!"***

Optimista je inteligentan i pronicljiv i on živi život koji je ispunjen radošću i srećom, zahvalan Allahu na blagodatima i strpljiv u pogledu Allahove odredbe i sudbine.

Treće svojstvo koje smo spomenuli jeste ignorisanje grješaka i uvreda, koje dolaze od strane neznalica i pokvarenjaka. Uzvišeni Allah je tako lijepo, lahko i jednostavno objasnio kako se treba odnositi prema takvim ljudima, rekavši: **"Ti sa svakim – lijepo! I traži da se čine dobra djela, a nezalica se kloni!"** (El-E'raf, 199.)

Ignorisanje je jedno od svojstava robova Milostivog ('Ibadur-Rahman), kao što se navodi u ajetu: **"A robovi Milostivoga su oni koji po Zemlji mirno hodaju, a kada im se bestidnici obrate, oni odgovaraju: 'Mir!'"** (El-Furkan, 63.)

Ignorisanje, zanemarivanje i predviđanje tuđih pogrešaka je ujedno i dokaz lijepog ahlaka.

S tim u vezi se prenosi da je Muavija, r.a., rekao: "Razum je mjera, od koje je trećina inteligencija, a dvije trećine ignorisanje."

Imam Ahmed ibn Hanbel, r.h., je znao reći: "Devet desetina lijepog ahlaka je u ignorisanju."

A imam el-Dževzi, r.h., je rekao: "Ignorisati grješke je jedna od najboljih i najplemenitijih osobina. Ljudi su skloni promašajima i grješkama, pa ako čovjek obraća pažnju na svaku grješku, umorit će se. Mudar i pametan je onaj koji ne istražuje svaki detalj sa svojim bračnim drugom, porodicom, prijateljima, komšijama i kolegama, tako da je ugodno sa njim sjediti i biti u njegovom društvu."

Zato, brate moj! Nemoj dozvoliti da izgubiš bračnog druga, porodicu i prijatelje zbog stalnog sumnjičenja i prigovaranja za najmanje pogreške. Život ne zavisi od jedne situacije, pa se zato čuvaj da ne prekineš vezu sa onima koju ti znače nešto u životu i do kojih ti je stalo. Ignoriši i opraštaj, i neka ti je srce uvijek čisto kada komuniciraš sa drugim muslimanima. Život će ti donijeti puno situacija koje ti ne odgovaraju i kojima nisi zadovoljan. Ako ne budeš ignorisao, izgubit ćeš puno vremena, zdravlja i živaca, a probleme nećeš riješiti.

Isto tako, koliko god je to moguće, smanji druženje sa onima koji se uvijek žale, kojima se u životu ništa ne sviđa, koji samo prigovaraju, kritikuju i osuđuju! Druži se sa onima koji vole optimizam i vedrinu, i na čijim licima se odražava sreća čak i onda kada su u problemima i velikim životnim iskušenjima.

Molim Dragog Allaha da nam pomogne da se okitimo spomenutim osobinama i da nam dadne snage da izađemo na kraj sa onima koji nam čak ni u mjesecu Ramazanu duši ne daju mira. Neka ih Dragi Allah zabavi njihovim životom i problemima. Neka nam se svima smiluje u ovom mjesecu milosti. Amin.